

Morning Dogri (NSD) National News Bulletin 06-04-2024

आकाशवाणी

- लोकसभा चुनावं गी दिक्खदे होई मुख्य भरै च चुनावं प्रचार तेज होई गेआ ऐ। बीजेपी दे वरिष्ठ नेता ते प्रधानमंत्री नरेन्द्र मोदी होर अज्ज सहारनपुर ते अजमेर च जिसलै के कांग्रेस अध्यक्ष मल्लिकार्जुन खड्गे जयपुर च चुनावी रैली करगंन।
- लोकसभा चुनावं दरान हर संसदी हल्के च खास तौर पर महिलाएं लेई विशेष बूथ खडेरे जांगन तां जे महिला मतदाताएं दी प्रतिशत गी बधाया जाई सकै।
- सुरक्षाबलें उत्तरी कश्मीर दे उड़ी सेक्टर च घुसपैठ दी इक कोशश गी नाकाम बनाया ते अपनी कारवाई च दरुं घुसपैठिएं गी मारी मकाया ऐ।
- मौसम विभाग नै अज्ज ते कल देशो दे पूर्वी ते समुंद्री कंडे आले इलाकें च लूह चलने दे असार जताए न।
- आईपीएल क्रिकेट च जंदी रातीं हैदराबाद च होए दे मकाबले च सनराइजर्स हैदराबाद नै चिन्नेई सुपर किंग्स गी 6एं विकटें कन्नै हराई दित्ता।

<><><><><><>

Election Campaign

लोकसभा चुनावं लेई प्रचार अभियान तेज होई गेआ ऐफ। प्रमुख राजनीतिक दलें दे वरिष्ठ नेता, देशो दे बक्ख-बक्ख हिस्सें च जनसभां ते रोड शो करे करदे न।

<><><><><><>

PM-Rajasthan

भारती जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज राजस्थान दे अजमेर जिले च पुष्कर दे कोल चुनावी रैली गी संबोधत करगंन। अजमेर ते पुष्कर थमां बीजेपी दे मेदवारें दे समर्थन च एह रैली आयोजित कीती जा'रदी ऐ। लोकसभा चुनावं लेई प्रधानमंत्री मोदी हुंदी राजस्थान च एह त्रीह जनसभा ऐ।

तोआई दूई बक्खी कांग्रेस अपने घोषणा पत्र दे सरबंधै च अज्ज जयपुर च बड्डी जनसभा दा आयोजन करै करदी ऐ। कांग्रेस अध्यक्ष मल्लिकार्जुन खड्गे ते पार्टी नेता सोनिया गांधी बी जनसभा गी संबोधत करगन। तोआई प्रधानमंत्री मोदी होर अज्ज बडलै उत्तर प्रदेश दे सहारनपुर च बी इक जनसभा अगगे भाषण देंगन। फही अजमेर दे दौरे परैत संजा'लै ओह गाजियाबाद च रोड शो करगन।

<><><><><><>

Amit Shah

बीजेपी दे वरिष्ठ नेता ते केन्द्री गृहमंत्री अमित शाह होर एनडीए दे मेदवार राजीव चन्द्रशेखर हुंदी चुनावी रैली च शामिल होने लेई अज्ज केरल दे तिरुवनतपुरम जांगन। अमित शाह होर राजीव चन्द्रशेखर हुंदे कन्नै लेयतिनकारा च इक रोड शो च बी शामिल होंगन।

<><><><><><>

J.P-Nadda

भारती जनता पार्टी दे अध्यक्ष जगत प्रकाश नड्डा लोकसभा चुनावं च एनडीए मेदवारें दे समर्थन च प्रचार लेई अज्ज कोझिकोड जांगन। ओह संजा'लै अरिथिदातू पलम थमां मुथाकुलम बश्कार इक रोड शो बी करगन।

<><><><><><>

Women Booth

लोकसभा चुनावं च हर संसदीय क्षेत्र च महिलाएं लेई खास तौरा पर टकोहदा बूथ होग तां जे महिला वोटरें दे फीसद गी बधाया जाई सकै। महाराष्ट्र च इस चाल्ली दे 440 बूथें दा प्रबंधन महिलाएं आस्सेआ कीता जाग। महाराष्ट्र च ठाणे जिले च सारे शा मती गिनतरी च 36 बूथें दा प्रबंधन महिलाएं आस्सेआ कीता जाग। एहदे मगरा जलगांऊ च 33 बूथ न। जिसलै के नासिक ते रत्नागिरी च हरेक च 30 बूथ होंगन ते मुंबई उपनगरीय इलाके 26 बूथ होंगन। वाशिम, सिंधुदुर्ग ते गडाचेरोली च त्रै-त्रै बूथ होंगन।

पुलस सनें इनें बूथें पर तैनात सब्बै अमले च महिला गै होंगन। चुनां कमीशन नै हिदायत दित्ती ऐ जे इनें बूथे गी कुसै टकोहदे रंग इस्तेमाल नेई होना चाहिदा, एहदे इलावा ईसीआई नै कुसै बी सियासी पार्टी कन्नै जुड़े दे रंग दा इस्तेमाल नेई करने दी सलाह दित्ती ऐ।

<><><><><><>

America Alert

अमरीका दे इक अधिकारी नै आक्खेआ ऐ जे इजराइलिंग गी नशाना बनाने ते अमरीकी संपत्तिएं पर हमला करने दी ईरान दी संभवित तैआरी गी दिक्खदे होई अमरीका च हाई अलर्ट जारी कीता गेआ ऐ। सीरिया च ईरानी दूतावास पर होए दे इजराइली हमले दे परते च एह हमले कीते जाई सकदे न। इस हमले च ईरान दा इक बड्डा कमांडर मारेआ गेआ हा।

<><><><><><>

JK-Uri

केन्द्र शासत प्रदेश जम्मू कश्मीर च कल सुरखाबलें उत्तरी कश्मीर दे बारामुला दे उड़ी इलाके च कब्जा रेखा दे नेड़े सबूरा नाला च आतंकवादिएं दी घुसपैठ दी कोशश नाकाम करी दित्ती ते दऊं घुसपैठिएं गी मारी मकाया। फौज दी चिनार कोर दे इक अधिकारी नै दस्सेआ जे आतंकवादिएं नियंत्रण रेखा पर भारत बक्खी बड़ने दी कोशश कीती। सुरखाबलें दी परते आली कारवाई च दऊं घुसपैठिए मारे गे। टाकरे परैत इलाके च तलाशी अगियान चलाया गेआ जेहदे च 2 ए.के. राफलां, 4 हत्थगोले ते गोला-बरूद बरामद होआ। फौज दे इक अधिकारी मूजब नियंत्रण रेखा पर फौज दे जवान पूरी चाल्ली सतर्क न ते उंदी तुरत कारवाई करी घुसपैठ दी कोशश नाकाम होई ऐ। तोआई जम्मू कश्मीर दे पीर पंचाल इलाके च सुरक्षा मापदंडें गी मजबूत करने दे मकसद कन्नै जम्मू कश्मीर पुलसा दे डरैक्टर जनरल आर.आर. स्वैन होरें पुलस ते सिविल प्रशासन दे होरनें बड्डे ऐहलकारें कन्नै बन्ने आले जिले पुंछ दा दौरा लाया। उंदे इस दौरे दा मुंडला मकसद जिले च मजूदा सुरक्षा हालात दा जायजा लैता हा।

<><><><><><>

संशोधित दिशा निर्देश दे मताबक 11मीं ते 12मीं जमात च मते विकल्पिय सुआले जां कोर्स आधारत सुआले, स्रोत-आधारत समेकित सुआले जां कुसै होर किस्म दे सुआलें दे रूपै च योग्यता केन्द्रित सुआलें गी 40 फीसद थमां 50 फीसद करी दित्ता गेआ ऐ। पर नमीं कलासं लेई 9मीं ते 10मीं जमात लेई ब'रे दे खीरै च होने आले दमतेयान नेई शैक्षणिक सत्र 2024-25 सुआल परचे दे खाके च कोई बदलाव नेई कीता गेआ ऐ।

<><><><><><>

Ladakh 144

लद्दाख दे लेह जिले च रमानदारी बनाई रखने लेई अज्जै थमां दफा 144 लागू करी दित्ती गई ऐ। ऐसी कोई ब्यानबाजी नेई करने दा बी हुक्म दित्ता गेआ ऐ जेहदे कन्नै सांप्रदायिक सौहार्द ते रमानदारी बिगड़े, जां जेहदे नै जिले च कनून बवस्था कन्नै जुड़ी दी कोइ बी समस्या पैदा होए। दफा 144 लागू होने करी हुन कुसै बी चाल्ली दा जलूस, रैली जां मार्च कड्डने लेई लेह दे जिला मैजिस्ट्रेट दफतर थमां लिखित इजाजत लैनी होग।

<><><><><><>

Cricket

आईपीएल च कल जंदी रातीं सनराइजर्स हैदराबाद नै हैदराबाद च खेड्डे गेदे इक मैच च चिन्नेई सुपर किंग्स गी 6 विकटें कन्नै हराई दित्ता। जित्त लेई 166 रंजें दा पिच्छा करदे होई सनराइजर्स हैदराबाद नै 6 विकटें ते 11 गेंदा बकाया रौहदे एह लक्ष्य हासल करी लैता। हैदराबाद लेई अभिषेक शर्मा नै छड़ी 12 गेंदें च 37 रंज बनाए जदके एडेन मार्करम नै 26 गेंदें च 50 रंजें दा योगदान दित्ता। चिन्नेई लेई शिवम दूबे नै 24 गेंदें च सब्बने शा मते 45 रंज बनाए। अभिषेक शर्मा गी इस मैच दा सब्बने शा बेह्तरीन खडारी चुनेआ गेआ। अज्ज संजा साढ़े 7 बजे जयपुर च राजस्थान रॉयल दा मकाबला रॉयल चैलेंजर्स बैंगलोर कन्नै होग।

<><><><><><>